



INFORME DE LEGALIDADE SOBRE O “PROXECTO DE DECRETO POLO QUE SE ESTABLECE O CURRÍCULO DO CICLO DE GRAO SUPERIOR CORRESPONDENTE AO TÍTULO DE TÉCNICO DEPORTIVO SUPERIOR EN HÍPICA.”

Esta Secretaría Xeral Técnica de conformidade co artigo 43.2 da Lei 16/2010, de 17 de decembro, de organización e funcionamento da Administración xeral e o sector público autonómico de Galicia, en relación co “proxecto de decreto polo que se establece o currículo do ciclo de grao superior correspondente ao título de técnico deportivo superior en Hípica”, emite o seguinte:

INFORME

1.Marco normativo e competencial

O artigo 31 do Estatuto de autonomía de Galicia, aprobado pola Lei orgánica 1/1981, do 6 de abril, sinala que é da competencia plena da Comunidade Autónoma galega o regulamento e administración do ensino en toda a súa extensión, niveis e graos, modalidades e especialidades, no ámbito das súas competencias, sen prexuízo do disposto no artigo 27 da Constitución e nas leis orgánicas que, conforme o apartado primeiro do artigo 81 da mesma, o desenvolvan, das facultades que lle atribúe ó Estado o número 30 do apartado 1 do artigo 149 da Constitución e da alta inspección precisa para o seu cumprimento e garantía.

A Lei orgánica 2/2006, do 3 de maio, de educación, configura no seu artigo 3 as ensinanzas deportivas como ensinanzas de carácter especial e o seu artigo 63 establece que o currículo das ensinanzas deportivas axustarase ás esixencias derivadas do Sistema nacional de cualificacións e formación profesional e ao establecido no número 3 do artigo 6.bis da lei orgánica.

O Real decreto 1363/2007, do 24 de outubro, polo que se establece a ordenación xeral das ensinanzas deportivas de réxime especial define no seu artigo 5 a organización básica das ensinanzas deportivas, tomando como base as modalidades deportivas e, de ser o caso, as súas especialidades, de conformidade co recoñecemento outorgado polo Consello Superior de Deportes.



Neste sentido, o Goberno da Nación aprobou o Real decreto 934/2010, do 23 de xullo, polo que se establece o título de técnico deportivo superior en Hípica e fixa as súas ensinanzas mínimas e os requisitos de acceso.

Segundo o artigo 29 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, corresponde á secretaría xeral técnica emitir informe sobre os anteproxectos de lei e proxectos de regulamentos da consellería e tramitalos.

2. Acerto e oportunidade

Logo de que o Goberno fixase no Real decreto 934/2010, do 23 de xullo, o perfil profesional do ciclo de grao superior en Hípica, as súas ensinanzas mínimas e os requisitos de acceso, e aqueles outros aspectos da ordenación académica que constitúen os aspectos básicos do currículo, procede determinar, no ámbito de xestión da Administración xeral da Comunidade Autónoma de Galicia, a ampliación e contextualización dos contidos dos módulos de ensino deportivo incluídos no ciclo de grao superior, respectando os seus perfís profesionais.

As ensinanzas que regula este decreto configúranse para dotar o alumnado dos coñecementos suficientes para permitirlles o exercicio competente das funcións do seu perfil profesional. De acordo con este obxectivo xenérico, ponse o acento en conseguir unha formación completa, cun equilibrio entre o carácter teórico e práctico, de maneira que o proceso de formación se vincule á realidade científico-técnica e social da hípica.

3. Tramitación

Polo que respecta á instrución na elaboración do proxecto normativo, esta acomodouse ao procedemento legal e ás prescricións contidas nos artigos 40 a 44 da Lei 16/2010, do 17 de decembro, de organización e funcionamento da Administración xeral e o sector público autonómico de Galicia.



Así, o centro directivo impulsor remitiu á Vicesecretaría Xeral o borrador da disposición acompañado dos documentos que de seguido se relacionan, (artigo 41.2. apartados a), b), d), da Lei 16/2010, do 17 de decembro):

- Unha memoria xustificativa sobre a súa legalidade, o seu acerto e a súa oportunidade.
- Unha memoria económico-financeira.
- Unha táboa de vixencias.

Unha vez recibida a documentación e logo do seu estudo, o Servizo Técnico-Xurídico da Consellería, elaborou o preceptivo informe e obtivo a aprobación inicial do anteproxecto como proxecto pola persoa titular da Consellería de Cultura, Educación e Ordenación Universitaria (artigos 41.2 c) e 41.3 da Lei 16/2010, do 17 de decembro).

Unha vez aprobada inicialmente a disposición como proxecto, este publicouse na páxina web da Xunta de Galicia (Portal de transparencia e goberno aberto), na relación dos procedementos de elaboración de disposicións administrativas de carácter xeral que estean en curso, indicando o seu obxecto e estado de tramitación, así como a posibilidade que teñen as persoas de remitir suxestións e a forma de facelo (artigo 9 c) da Lei 1/2016, do 18 de xaneiro, de transparencia e bo goberno e artigo 41.4 da Lei 16/2010, do 17 de decembro). Con data do 20 de decembro de 2016 a Dirección Xeral de Educación, Formación Profesional e Innovación Educativa emitiu un informe no que indicaba que non se recibiron alegacións neste período de exposición pública.

Na tramitación do anteproxecto e ao abeiro do esixido no artigo 42 da LOFAXGA así como na pertinente normativa sectorial de aplicación, solicitáronse informes á Secretaría Xeral de Igualdade e á Dirección Xeral de Planificación e Orzamentos, e o texto remitiuse para o seu estudo ao Consello Escolar de Galicia.

A Dirección Xeral de Planificación e Orzamentos emitiu o seu informe favorable con data do 26 de setembro de 2016 e a Secretaría Xeral de Igualdade emitiu o seu informe de impacto de xénero con data do 15 de xullo de 2016. Así mesmo, na súa xuntanza do 20 de decembro de 2016 o Consello Escolar de Galicia emitiu o seu ditame en relación co proxecto de decreto.



Con data do 20 de decembro de 2016 a Dirección Xeral de Educación, Formación Profesional e Innovación Educativa emitiu un informe no que se pronunciaba sobre as suxestións recibidas no informe da Secretaría Xeral de Igualdade. Así mesmo, con data do 26 de decembro de 2016 a Dirección Xeral de Educación, Formación Profesional e Innovación Educativa emitiu un informe no que se pronunciaba sobre as suxestións recibidas no ditame do Consello Escolar de Galicia.

Con data do 21 de marzo de 2017 emitiu o seu informe a Asesoría Xurídica da Consellería de Cultura, Educación e Ordenación Universitaria e con data do 3 de abril de 2017 a Dirección Xeral de Educación, Formación Profesional e Innovación Educativa emitiu un informe no que se pronunciaba sobre as suxestións recibidas no dito informe de Asesoría Xurídica.

4. Legalidade

O proxecto someterase á aprobación definitiva da persoa titular da Consellería de Cultura, Educación e Ordenación Universitaria e finalmente remitirase á Comisión de Secretarios Xerais previa á súa aprobación polo Consello da Xunta de Galicia, segundo o artigo 43 da Lei 16/2010, do 17 de decembro.

De acordo co indicado considérase que este proxecto de decreto reúne as condicións esenciais para a súa aplicación e efectividade polo que se considera que o proxecto de decreto sometido a informe se axusta á legalidade vixente, polo que o **informa favorablemente** (artigo 43.2 da Lei 16/2010, do 17 de decembro).



Santiago de Compostela, 2 de maio de 2017

O secretario xeral técnico

Jesús Oitavén Barcala